

Na osnovu člana 13. Zakona o principima lokalne samouprave u Federaciji BiH (Službene novine Federacije BiH“, broj 49/06), člana 2. stav 3. Zakona o javnim priznanjima Kantona Sarajevo («Službene novine Kantona Sarajevo» broj 7/06, 9/06 i 12/06), i člana 25. Statuta Općine Stari Grad Sarajevo – Prečišćeni tekst («Službene novine Kantona Sarajevo», broj 31/08), Općinsko vijeće Stari Grad Sarajevo, na sjednici održanoj 25. februara 2010. godine, donijelo je

## **O D L U K U**

### **O PRIZNANJIMA OPĆINE STARI GRAD SARAJEVO**

#### **I OSNOVNE ODREDBE**

##### **Član 1.**

Ovom Odlukom, Općina Stari Grad Sarajevo (u daljem tekstu: Općina), kao izraz zahvalnosti za izuzetna dostignuća i doprinos od posebnog značaja za razvoj i ugled Općine, te podsticanje na aktivnosti koje su tome usmjerene, utvrđuje priznanja, postupak predlaganja, donošenja odluke i dodjele priznanja, te razloge i postupak za njihov opoziv.

##### **Član 2.**

Priznanja Općine Stari Grad Sarajevo (u daljem tekstu: priznanja) se dodjeljuju pojedincima, organizacijama, institucijama, udruženjima, drugim pravnim subjektima, stranim državljanima i institucijama.

##### **Član 3.**

**(1)** Priznanja se ne mogu dodjeljivati:

- za iste zasluge licima kojima je Općina već dodjeljivala javna priznanja;
- izabranim zvaničnicima Općine i drugih nivoa vlasti u Bosni i Hercegovini za vrijeme trajanja njihovog mandata;
- uposlenicima Općine i drugih nivoa vlasti u Bosni i Hercegovini za rezultate ostvarene u obavljanju poslova predviđenih radnim mjestom izuzev lica iz člana 8. ove Odluke;
- licima koja su pravosnažnom sudskom presudom domaćeg ili stranog suda osuđena na zatvorsku kaznu za krivično djelo genocida i ratnog zločina;
- licima koja su pravosnažnom sudskom presudom domaćeg ili stranog suda osuđena na zatvorsku kaznu za ostala krivična djela ;
- licima koja svojim djelovanjem narušavaju ugled Općine;

(2) Ne može se, za dodjelu priznanja, predložiti osoba koja više nije u životu, osim ako je život izgubila izvršavajući djelo zbog kojeg se predlaže za dodjelu priznanja.

## **II VRSTE PRIZNANJA**

### **Član 4.**

Ovom Odlukom se ustanovljavaju sljedeća priznanja:

1. OPĆINSKA POVELJA SA ZLATNIM ŠTITOM
2. POVELJA SA GRBOM OPĆINE STARI GRAD SARAJEVO
3. ZLATNI SEBILJ
4. POLICAJAC GODINE
5. ZAHVALNICA OPĆINE STARI GRAD SARAJEVO

### **1. Općinska povelja sa zlatnim štitom**

#### **Član 5.**

(1) Općinska povelja sa zlatnim štitom se dodjeljuje demobilisanim borcima i jedinicama Armije RBiH i MUP-a RBiH, pripadnicima Civilne zaštite, udruženjima koja baštine tradiciju jedinica Armije RBiH i MUP-a RBiH, kao i drugim fizičkim i pravnim licima, koji su se svojim požrtvovanim djelovanjem naročito istakli u:

- organizovanju i izvođenju odbrane na području Općine, te otklanjanju opasnosti od ratnih razaranja njenog područja;
- organizovanju i djelovanju tijela civilnih vlasti i vitalnih javnih službi u uslovima ratnog stanja na području Općine i time doprinijeli unurašnjem snaženju odbrambenog sistema;
- zaštiti i spašavanju agresijom ugroženog stanovništva i
- pronošnju istine o suštini agresije na RBiH .

(2) Godišnje se mogu dodijeliti najviše 2 (dvije) pojedinačne i 1 (jedna) kolektivna Općinska povelja sa zlatnim štitom.

### **2. Povelja sa grbom Općine Stari Grad**

#### **Član 6.**

(1) Povelja sa grbom Općine Stari Grad se dodjeljuje domaćim fizičkim i pravnim licima za izuzetan doprinos:

- u izgradnji i jačanju institucija lokalne zajednice u Općini i njenoj afirmaciji u zemlji i inostranstvu;
- u prosvjetnoj djelatnosti i organizovanju vaspitno – obrazovnog rada;

- u uspješnoj i istaknutoj naučnoj djelatnosti u svim oblastima;
- na razvoju komunalne infrastrukture;
- za investiciona ulaganja u proširenje proizvodnih kapaciteta i upošljavanje većeg broja radnika;
- u promovisanju i razvoju Općine kao turističke destinacije;
- u očuvanju i njegovanju prirodnog i kulturno-historijskog naslijeđa;
- u razvoju bankarskih i institucija osiguranja;
- u proizvodnji hrane;
- u oblasti zdravstva i socijalne zaštite;
- prostornom razvoju Općine;
- u unaprjeđenju i zaštiti čovjekove životne i radne okoline;
- u oblastima kulture, fizičke kulture i sporta;
- u drugim oblastima od značaja za Općinu.

(2) Godišnje se mogu dodijeliti najviše 2 (dvije) pojedinačne i 1 (jedna) kolektivna Povelja sa grbom Općine Stari Grad.

### **3. Zlatni sebilj**

#### **Član 7.**

(1) Priznanje Zlatni sebilj se dodjeljuje građanima i institucijama Općine i drugih nivoa vlasti u Bosni i Hercegovini, pojedincima i institucijama prijateljskih općina, kao i stranim državljanima i institucijama koje su dale naročit doprinos u razvoju i afirmaciji Općine, razvoju međunarodnih i međuljudskih odnosa na načelima solidarnosti, demokratičnosti, humanosti i tolerancije među ljudima, te pružanju ekonomske pomoći.

(2) Godišnje se mogu dodijeliti najviše 2 (dva) pojedinačna i 2 (dva) kolektivna priznanja Zlatni sebilj.

### **4. Policajac godine**

#### **Član 8.**

(1) Općinsko priznanje Policajac godine dodjeljuje se pojedincima, policijskim službenicima I Policijske uprave – Policijska stanica Stari Grad Sarajevo, za izuzetan doprinos i postignute rezultate u zalaganju za ostvarivanje što povoljnije bezbjednosne situacije na području općine Stari Grad Sarajevo u prethodnom jednogodišnjem periodu.

(2) Godišnje se može dodijeliti najviše 1 (jedno) pojedinačno priznanje Policajac godine.

### **5. Zahvalnica Općine Stari Grad**

#### **Član 9.**

(1) Zahvalnica Općine Stari Grad dodjeljuje se građanima i institucijama Općine i drugih nivoa vlasti u Bosni i Hercegovini, pojedincima i institucijama prijateljskih općina, kao i

stranim državljanima i institucijama koji su dali naročit doprinos u razvoju i promovisanju Općine u oblasti ekonomije, nauke, obrazovanja, kulture, fizičke kulture i sporta, zdravstva i socijalne zaštite i drugim oblastima od značaja za Općinu.

(2) Zahvalnice Općine Stari Grad, čiji broj nije ograničen, dodjeljuju se u toku cijele godine na prijedlog Načelnika Općine, Predsjedavajućeg i Kolegija Općinskog vijeća.

### **III POSTUPAK PREDLAGANJA, DONOŠENJA ODLUKE, DODJELA PRIZNANJA I OPOZIV PRIZNANJA**

#### **Član 10.**

(1) Prijedloge za dodjelu priznanja iz člana 5. do 8. ove Odluke mogu podnijeti:

- građani Općine;
- vijećnici Općinskog vijeća;
- Predsjedavajući Općinskog vijeća;
- Općinski načelnik;
- udruženja registrovana na području Općine;
- političke partije koje djeluju na području Općine;
- klubovi vijećnika Općinskog vijeća;
- savjeti mjesnih zajednica sa područja Općine;
- privredna društva sa registrovanom djelatnošću na području Općine;
- ustanove i
- druge organizacije i pojedinci;

(2) Prijedlozi za dodjelu priznanja podnose se Komisiji za priznanja (u daljem tekstu. Komisija) u pisanom obliku sa detaljnim obrazloženjem i relevantnim dokazima, a u skladu sa kriterijima iz člana 5. do 9. ove Odluke.

#### **Član 11.**

(1) Komisiju iz člana 10. stav 2. ove Odluke, imenuje Općinsko vijeće iz reda vijećnika, članova radnih tijela i boračkih udruženja.

(2) Komisija ima 17 članova.

(3) Predsjedavajući Općinskog vijeća i zamjenik predsjedavajućeg su, po funkciji, predsjednik, odnosno zamjenik predsjednika Komisije.

(4) Ostali članovi Komisije su:

- članovi Komisije za izbor i imenovanje,
- predstavnik Komisije za pitanja boraca i žrtava rata,
- predstavnik Komisije za fizičku kulturu i sport

- predstavnik Komisije za privredni razvoj, zanatstvo i turizam
- predstavnik Komisije za obrazovanje, kulturu i kulturno-historijsko naslijeđe
- dva predstavnika koje predlaže Koordinacija boračkih udruženja iz reda svojih članova,

(5) Rješenje o imenovanju članova Komisije donosi Općinsko vijeće za svaku godinu posebno.

### **Član 12.**

Komsija donosi poslovnik kojim reguliše pitanja organizacije, način rada i bliže kriterije za dodjelu priznanja iz člana 4. ove Odluke.

### **Član 13.**

(1) Komisija je dužna da, najkasnije 45 (četrdeset pet) dana prije dana određenog za dodjelu priznanja, u sredstvima javnog informisanja objavi javni poziv za podnošenje prijedloga kandidata za dodjelu priznanja, uz kriterije koje prijedlozi moraju ispunjavati da bi bili razmatrani, sa naznakom roka njihovog podnošenja.

(2) Rok za podnošenje prijedloga Komisiji je 15 dana od dana objavljivanja javnog poziva.

### **Član 14.**

Komisija razmatra podnesene prijedloge i utvrđuje konačan prijedlog za dodjelu priznanja sa obrazloženim stavom.

### **Član 15.**

O dodjeli priznanja Općinsko vijeće donosi Odluku nadpolovičnom većinom ukupnog broja vijećnika u Općinskom vijeću.

### **Član 16.**

(1) Priznanja iz člana 4. ove Odluke dodjeljuje Općinsko vijeće na svečanoj sjednici Općinskog vijeća, zakazanoj povodom Dana Općine ili u dane utvrđene Odlukom o obilježavanju značajnih događaja, datuma i ličnosti iz perioda agresije 1992.-1995. godina i u drugim prigodama.

(2) Priznanje Zlatni sebilj će se, dobitnicima iz prijateljskih općina i stranih država koji zbog opravdane spriječenosti ne budu prisustvovali svečanoj sjednici iz stava 1. ovog člana, uručiti naknadno.

### **Član 17.**

- (1) Dodijeljeno priznanje se može opozvati.
- (2) Opoziv priznanja vrši se na način i po postupku za dodjelu priznanja.
- (3) Priznanja će se opozvati ako se naknadno utvrde ograničenja za dodjelu priznanja iz člana 3. ove Odluke.

### **Član 18.**

Oblik i izgled (dizajn) priznanja iz člana 3. ove Odluke, utvrdit će Kolegij Općinskog vijeća Stari Grad Sarajevo na prijedlog Komisije za priznanja Općinskog vijeća Stari Grad Sarajevo (u daljem tekstu: Komisija).

## **IV PRELAZNE I ZAVRŠNE ODREDBE**

### **Član 19.**

Sredstva namijenjena za realizaciju ove Odluke utvrđuju se u Budžetu Općine za svaku kalendarsku godinu posebno.

### **Član 20.**

Stručne i administrativne poslove vezane za rad Komisije kao i vođenje evidencije o dodijeljenim priznanjima obavlja Stručna služba Općinskog vijeća.

### **Član 21.**

Stupanjem na snagu ove odluke prestaje da važi Odluka o priznanjima Općine Stari Grad Sarajevo („Službene novine Kantona Sarajevo“, broj 9/06 i 7/09).

### **Član 22.**

Ova Odluka stupa na snagu danom donošenja, a bit će objavljena u „Službenim novinama Kantona Sarajevo“.

PREDSJEDAVAJUĆI  
OPĆINSKOG VIJEĆA STARI GRAD  
S A R A J E V O

Broj: 02-49-  
Februar, 2010. godine  
Sarajevo

Prof. dr. Rizah Avdić